

PRANUAR MË:

ACCEPTED ON: 05.05.2011

PRIMLJENO:

Nr.No.Br. 02/99

REPUBLIKA E KOSOVËS
KUVENDI I KOMUNËS NË MALISHEVË



Në bazë të nenit 12.2 dhe nenit 34 të Ligjit për Vetëqeverisjen Lokale nr.03/ L-040, Udhëzimit Administrativ nr.2008 / 08 të Ministrisë së Administrimit të Pushtetit Lokal (MAPL), Nenit 15 të Statutit të Komunës së Malishevës nr.01 /871 dhe Vendimit të Kuvendit të Komunës së Malishevës për Shpalljen e Zgjedhjeve nëpër Vendbanime dhe Fshatra, Nr.02 / 77 të dt. 25. 03. 2011, Kuvendi i Komunës së Malishevës në mbledhjen e mbajtur me dt.29. 04. 2011, miraton këtë :

Rregullore

Për Organizimin e Zgjedhjeve nëpër Vendbanimet dhe Fshatrat e Komunës së Malishevës

Neni 1

Me këtë Rregullore parashihet organizimi, mbajtja e zgjedhjeve dhe zgjedhja e kryesive dhe kryetarëve nëpër vendbanimet dhe fshatrat e Komunës së Malishevës.

Neni 2

Zgjedhjet e parapara me këtë Rregullore do të organizohen gjatë muajit maj dhe qershor të vitit 2011 në 43 fshatrat e kësaj komune dhe në qendrën komunale të Malishevës dhe lagjet e saja.

Territori i Komunës së Malishevës, fshatrat dhe vendbanimet e saj, janë paraparë me nenin 6 të Statutit të Komunës.

Neni 3

Kryesia e fshatit mund të ketë vulën në mbishkrimin e së cilës duhet të figuroj teksti për emrin e shtetit, emrin e komunës dhe emrin e fshatit.

Neni 4

Pas zgjedhjeve, secili fshat sikur edhe Malisheva si vendbanim i veçantë do të kenë kryesinë të përbërë prej numrit të caktuar të anëtarëve e që ky numër përcaktohet varësisht nga numri i përgjithshëm i banorëve të fshatit dhe e cila nuk mund të ketë më pak se 7 anëtarë dhe nuk mund të kaloj numrin prej 11 anëtarë.

Neni 5

-Fshati apo vendbanimi i cili numëron deri në 2000 banorë do të ketë kuvendin prej 21 delegatëve dhe kryesinë prej 7 anëtarëve,

- Fshati ose vendbanimi që ka 2000 deri në 3000 banorë do të ketë kuvendin prej 31 anëtarëve dhe kryesinë prej 9 anëtarëve,
Fshatrat apo vendbanimet me mbi 3000 banorë do të kenë kuvendin prej 41 anëtarëve dhe kryesinë prej 11 anëtarëve

Neni 6

Kryesia do të ketë Kryetarin, Nënkryetarin dhe Sekretarin të cilët zgjidhen nga kryesia në mbledhjen e saj të parë kurse rëndësi do ti kushtohet edhe përfaqësimit gjinorë.

Kryesia zgjidhet me mandat 4 vjeçar.

Nëse ndonjë nga anëtarët e kryesisë për shkaqe të ndryshme largohet apo nuk mund të ushtroj detyrën, kryesia ka të drejtën e plotësimit të vendit të tij me një anëtarë tjetër nga regjistri zgjedhorë sipas numrit të votave kurse për një veprim të tillë njoftohet me shkrim Kuvendi Komunal.

Kompensimi për mëditje i kryetarit të fshatit do të jetë 30 euro me mundësi rritje nga kuvendi komunal.

Neni 7

Fshati për mbledhjen zgjedhore do të njoftohet 10 ditë para mbajtjes së saj përmes shpalljes publike, WEB – faqes së Komunës apo mjeteve të informimit publik.

Mbledhjen zgjedhore të fshatit e hap Kryetari i Fshatit nga zgjedhjet e fundit e në mungesë të tij nënkryetari ose anëtari më i vjetër në takim i cili për këtë qëllim do të propozoj një kryesi pune prej 3 anëtarëve e cila më pastaj do të drejtoj mbledhjen në të cilën do të zgjidhet kuvendi i fshatit.

Gjatë zgjedhjes së kuvendit, kujdes i veçantë do ti kushtohet përfaqësimit të lagjeve proporcionalisht me numrin e banorëve të saj.

Mbledhjen e kuvendit e thërret dhe e drejton anëtari më i vjetër i saj, i shoqëruar nga anëtari më i ri kurse kuvendi me vota të fshehta zgjedh kryesinë. Vendimet e kryesisë merren me shumicë të votave. Kuvendin gjatë mandatit të tij 4 vjeçar, e drejton kryetari i fshatit kurse mbledhjet e tij mund t'i thërras edhe 1 / 3 e anëtarëve të kuvendit.

Gjatë mbajtjes së mbledhjes zgjedhore në fshat si dhe kuvendit, mbahet procesverbali një kopje e të cilit i dorëzohet Komisionit Komunal për organizimin dhe monitorimin e zgjedhjeve menjëherë pas mbledhjes.

Në rast të konstatimit të parregullsive, Komisioni Komunal me shumicë votash ka të drejtë të anuloj vendimet e mbledhjes dhe të kërkoj përmirësimin e dobësive të vërejtura.

Neni 8

Detyrat dhe përgjegjësitë e kryesisë

Kryesia e fshatit apo vendbanimit ka këto detyra dhe përgjegjësi

- Harton dhe miraton rregullat e punës së kryesisë,
- Organizon, përcjellë dhe planifikon zhvillimet e lokalitetit në bashkëpunim me Kryetarin e Komunës, Kuvendin e Komunës, Komitetet dhe Drejtoritë Komunale,
- Emëron Komisionet përkatëse për të realizuar objektivat e fshatit , vendbanimit dhe të lagjes,
- Bashkë me Institucionet Komunale harton programet zhvillimore të lokalitetit në të gjitha sferat,
- Ndërmerr iniciativa për ruajtjen e objekteve në pronësi të fshatit (siç janë varrezat) dhe të komunës kurse ka të drejtën e paraqitjes së uzurpimeve arbitrare në organet kompetente komunale,
- Ndërmjetëson në zgjidhjen e konflikteve eventuale në mes të banorëve të fshatit dhe më gjërë,
- Përkujdeset për mirëmbajtjen e hapësirave publike dhe për një ambient të pastër,
- U propozon organeve kompetente mundësinë e ndryshimit të emrit të fshatit apo lagjes si dhe emërtimin e rrugëve kryesore të fshatit apo të lagjes,

- Në bazë të nevojave dhe të kërkesës së qytetarëve apo me iniciativën e Kryesisë mund të përcaktohet grumbullimi i vetë kontributit të qytetarëve në pajtueshmëri me legjislacionin e zbatueshëm,
- Raporton për mjetet e mbledhura për projekte të caktuara dhe i bënë ato transparente për qytetarët e ati lokaliteti në harmoni me Ligjin mbi Transparencën, Statutin e Komunës dhe akte tjera normative,
- Siguron të dhënat elementare për çdo familje të lokalitetit përkatës, përcjellë gjendjen ekonomike dhe materiale të tyre dhe jep propozime në lidhje me përmirësimin e gjendjes,
- Me vetë kontributin e fshatit mund të caktoj rojën fushore të fshatit, kurse pjesëmarrja në kontribut do të jetë varësisht prej pasurisë fushore që posedon,
- Bashkëpunojnë me organet komente komunale në rast të ndonjë fatkeqësie eventuale,
- Nxjerr Vendime dhe Rekomandime në interes të qytetarëve të lokalitetit që e përfaqëson në pajtim me legjislacionin e zbatueshëm dhe kërkon mbështetjen e organeve kompetente në pajtim me ligjin,
- Jep pëlqimin për dhënien në shfrytëzim të pronës publike që është në zonën kadastrave të fshatit.

Neni 9

Përgjegjësitë e bartura

Me kërkesën e Kryesisë së Fshatit dhe Rekomandimin e Kryetarit të Komunës, Kuvendi i Komunës me Vendim të posaçëm mund të bartë disa përgjegjësi për ti ushtruar Kryesia e fshatit apo vendbanimit kurse komuna do të ofroj përkrahje profesionale dhe financiare për fshatrat dhe vendbanimet me qëllim të përmbushjes së përgjegjësisë së bartur.

Për përgjegjësitë e bartura, kryesia mbanë përgjegjësi ligjore në rast të keqpërdorimit eventual kurse përgjegjësia është individuale para organeve kompetente ligjore.

Neni 10

Kryesitë e Fshatrave dhe Vendbanimeve të Komunës së Malishevës me pëlqimin e tyre mund të organizohen dhe bashkëpunojnë në mes veti për ushtrimin e aktiviteteve të përbashkëta të bartura nga komuna apo nga sferat tjera me interes për qytetarët dhe për këtë qëllim ato mund të formojnë komisione të përbashkëta për të cilën gjë ato do të njoftojnë Kuvendin e Komunës.

Neni 11

Kryesia e fshatit për çështje të caktuara mbanë mbledhje nga kompetenca e saj kurse për të kryer punën në mënyrë më të efektshme mund të formoj komisione të ndryshme si komisionin për pajtim, komisionin për infrastrukturë e të tjera të cilat për punën e tyre i përgjigjen kryesisë kurse kryesia për punën e saj 2 herë në vit e njofton kuvendin i cili e ka zgjedh.

Kryesia vendimet e saja i merr me shumicë votash. Kryesinë e përfaqëson kryetari i cili edhe mbanë kontaktet me komunën si dhe është i obliguar të merr pjesë në takimet që mbahen me kryetar të fshatrave.

Neni 12

Bashkëpunimi me Komunën

Kryetari i Komunës dhe Drejtoritë Komunale të Komunës së Malishevës koordinojnë punët me kryesinë e fshatrave dhe vendbanimeve përmes kryetarit të kryesisë së fshatit apo vendbanimit varësisht nga

specifikat që do të trajtohen dhe punët që janë në interes të qytetarëve të kësaj komune dhe vendbanimeve të saj.

Mos përmbushja e përgjegjësisë

Neni 13

Kryesia dhe kryetari i fshatit mund të shkarkohen edhe para kalimit të mandatit nëse nga zgjedhësit apo delegatët e kuvendit konstatohet se nuk kanë kryer obligimet e parapara me këtë rregullore dhe legjislacioni i zbatueshëm kurse shkarkimi bëhet sipas procedurës së njëjtë të zgjedhjes së kryesisë dhe kryetarit.

Neni 14

Lista e kryetarëve të fshatrave dhe vendbanimeve aprovohen nga Kuvendi Komunal sipas rezultateve që dalin nga zgjedhjet e organizuara në fshatra dhe pas dhënies së pëlqimit edhe nga Kryetari i Komunës së Malishevës në pajtim me Udhëzimin Administrativ nr. 2008 / 08 të MAPL.

Neni 15

Kjo Rregullore hyn në fuqi pas Miratimit nga Kuvendi i Komunës së Malishevës dhe nënshkrimit të saj nga Kryesuesi i Kuvendit kurse pas miratimit të saj nga një kopje do tu dërgohet kryetarëve aktual të Vendbanimeve dhe Fshatrave të Komunës së Malishevës dhe do tu shërbej për përgatitje të zgjedhjeve.

Neni 16

Për Zbatimin e kësaj Rregulloreje përkujdeset Kryetari i Komunës së Malishevës, Kuvendi i Komunës së Malishevës dhe Komisioni për Organizimin dhe Monitorimin e Zgjedhjeve nëpër Vendbanime dhe Fshatra të Komunës së Malishevës.



Kryesuesi i Kuvendit
Ragip Begaj



REPUBLIKA E KOSOVËS
KUVENDI KOMUNAL - MALISHEVË



Kuvendi i Komunës
Nr. 02/100
Datë: 05.05.2011

Mbështetur në nenet 11,12.2,34 të Ligjit për vetëqeverisjen lokale Ligji nr.03/L-040, Udhëzimit administrativ të MAPL-së nr. 2008/08 , rekomandimit të Komitetit për Politikë dhe Financa nr.02/89 datë 20.04.2011, nenet 12, 15,19.7 (shkronja e) të Statutit të Komunës së Malishevës nr.01/871 datë,12.11.2008

Kuvendi i Komunës së Malishevës në mbledhjen e mbajtur me datë, 29.04.2011 mori këtë:

V E N D I M

PËR MIRATIMIN E RREGULLORES PËR ORGANIZIMIN E ZGJEDHJEVE NËPËR VENDBANIME DHE FSHATRA TË KOMUNËS SË MALISHEVËS

Neni 1

Miratohet Rregullorja për organizimin e zgjedhjeve për kryesi dhe kryetar nëpër vendbanime dhe fshatra të Komunës së Malishevës.

Neni 2

Për zbatimin e këtij Vendimi përkujdesen ,Kryetari i Komunës, përmes organeve kompetente

Neni 4

Ky Vendim hyn në fuqi menjëherë nga dita e miratimit në Kuvendin e Komunës së Malishevës.



Kryesuesi i Kuvendit
Ragip Begaj